

# Gagauziyanın 17-nci yıldönümünün hem 2012-nci Eni Yılınan kutlêêrız!

HALK GAZETASI

GAZETANIN KURUCUSU:  
"GAGAUZLAR HALKLARARASI  
SOŞIAL ASOŞİAŞİYASI"

# GAGAUZLAR

NE MUTLUYUM, ANI GAGAUZUM!

№2/ 30.12.2011

En  
önemli  
haberlär



## Türkiyanın Büükelçisi Avtonomiyada

Moldova Respublikasında Türkiyanın Büükelçisi Ahmet Ferrit Ülker Gagauz Erinä son vizitini yaptı. Halk Topluşunun hem Bakannık Komitetinin öndercileri gagauz halkının adından ona kendi saygılını hem şükürlerini açıkladılar.

Çalışmak zamanında Büükelçi Türkiyanın hem Gagauziyanın arasında dostluk baalantılarının ilerlemesinde hem kaavilemesinde çok faydalı hem paasız işlär yaptı. Birerdä işlenildi türlü proektlar, saalık koruması, üretmek hem suvermek alaylarında dostluk baalantılarını ilerletmää deyni. Umutlanêrız, ki ileri dooru da Moldovada çalışmaktan sora, Canabinin görgüsü bu baalantılara deyni faydalı olacak.

Kendi son sözündä saygılı Büükelçi bütün ürektan nişannadı, ki Türkiyanın pravitelstvosa, türk halkı gagauz halkını kendi kan kardaşı gibi sayardı. Türk Devleti ileri dooru da gagauzlara yardımcı olacak.

Gagauz Avtonomiyasının öndercileri Türkiyanın Büükelçisine Ahmet Ferrit Ülkerä kaavi saalık, ayla iili hem gelän diplomatiya çalışmasında başarılar diledilär.

## Komratta halklararası konferenşiyası geçti

Gagauziyanın baş kasabasında Komratta noyabrinin 29-unda hem 30-unda halklararası bilim-praktika konferenşiyası geçti. Onun adıydı "Moldova Respublikasında üüsek okullarından öncä üretmek sistemasında kulturaarası dialogunun ilerlemek yolları". Bu yortuya gagauz dili üüredicileri Briçanı, Rişkani, Edine, Taraklı dolaylarından, Kişinövdan, Ukrainanın Odesa sıncaan Bolgrad dolayından, Kazahstandan katıldılar.

Konferenşiyaya katılannar nişannadılar bu meropriyatıya geçirilmesinin önemliliini da teklif ettilär bölä konferenşiyaları devletin türlü dolaylarında heryıl geçirmää. Bu kolaylık verer konferenşiyaya katılannara kendi görgülerinnän biri-birinnän paylaşmaa hem konferenşiyaya geçän teritoriyasında yaşayan insannarın kulturaarası tanışmaa. Bu gösterer bizim devletimizin birliini hem Moldovada yaşayan halkların çokçeşitli kulturalarını.

Bundan kaarä, konferenşiyanın musaafirlerinä bir kultura programası kuruldu, neredä onnar gagauz halkının istoriyasının, kulturaarası hem tradişiyalarınan tanıştılar.

## Vakit faydalı geçti

Gagauziyanın gençlerini milli ruhta terbiyetmää deyni, mutlak läâzım onnari tanıştırmää halkın ruh zengininiinän: istoriyalan, folklorlan, yazıcılarlan h. b. Dekabrinin 1- dä Komrat Devlet Universitetinin Gagauz filologiyası kafedrası geçirdi studentlerin görüşünü gagauz şairi, filologiya bilgileri doktoru Güllü Karanfillän. Bibliotekanın hazırladı stendlärdä vardı nasıl tanışmaa yazıcının kiyatlarınan, bilim yazılarınınan hem patretlerinnän. Bu görüştä Güllü Karanfil annatı kendi biyografyasını, kendi yaradıcılık yolunu, okudu birkaç şiirini. Büüyük havezlän studentlär okudular Güllü Karanfilin şiirlerini. Buluşmada musaafirä soruşlar verildi. Vakit studentlerä deyni dä, şairlä deyni dä pek meraklı, ama tez geçti. Bu türlü görüşlär yakınnaştırer üürenicileri yazıcıların yaratmarınan hem onnarın iç dünnäsinnän.

## Gagauz Erinin duuma günü kutluca olsun!

**Saygılı vatandaşlar!**  
Gagauziyanın Halk Topluşu adından Avtonomiyanın duuma gününä baalı yortu üzerinä en duygulu kutlamalar kabul ediniz!

17 yıl geçti o gündän, açan "Gagauziyanın (Gagauz Erinin) maasuz hak statusu için" kanunu imzalandı. Gagauzlar için en önemli yortu buydur.

Bizim tarafımızın istoriyasında çok aydınni sayfa var: önemli olaylar, tradişiyalar, adetlär, şanı yubileylär. Bu yortuda büüyük olayların maanası açıklanêr, insan topluluunda diişilmeklerin önemlili hem masştbları görüner.

Biz yok nicä görmeyelim o pozitif diişilmekleri, angıları oldular "Gagauziyanın (Gagauz Erinin) maasuz hakstatusu için"

kanunun kaaviletmesindän sora. Kultura, saalık koruması, üretmek, soşial hem politika, kasabaların hem küülerin düzülməsi olaylarında çok ii işlär yapıldılar. Açıldılar soşial tarafından türlü-türlü obyektlär, ilerleer kasaba hem küüdüzüntülüü, yıl-yıldan okulların hem uşak başçaların material bazası enilener, medişina kurumları eni aparatırayı kabul ederlär.

Biz şükür ederiz bizim dedelerimizä, angıları kurdular soşial-ekonomika, kultura, üretmek sferalarında bir gür potensial. Onnara hem büüyük evladboylarına baalı Gagauziyanın şindiki zamanda devletin üülenki tarafında ekonomika, politika hem kultura merkez olması. Bununan bilä bizim halkımız korudu kendi

istoriyasını, kulturaarası, adetlerini, burada yaşayan başka milletlerin dillerini. Halklar bu topraklarda dostlukta hem annaşmakta yaşêêr, Avtonomiyanın herbir küüyündä, kasabasında, herbir ayledä usluluk hem dirlik var. Gagauziyanın birlik, ruh zenginini hem yaratıcı enerjiyası çok sıra yardım ettilär peyda olan zorlukları ensemää da koyulmuş neetleri gerçää çıkarmaa. Bizim en büüyük hem önemli davamız halka izmet emää. Bu üzerä Gagauz Erinin duuma günü bütün çokmilletli halkının yortusu.

Herkezimizä kaavi saalık, varlık, kısmet hem herbir işinizdä başarılar dileeriz!

Ko bizim Vatanımız, Gagauziya, diveç yaşasın!

*Büük hatırlan  
Halk Topluşunun Başı  
Anna HARLAMENKO.*

## Kutlamak

### Saygılı Gagauziyada yaşayannar!

"Gagauzlar" Halklararası Soşial Asoşiaşiyası bütün ürektan hepsinizi gelän 2012-nci Eni Yılınan hem Kolada yortularınan kutlêêr!

Bizim aramızdan herkezi aklısına getirer geçän yılının olduklarını, düşüner gelän zamannar için hem umutlanêr Eni Yılda ii olaceklara.

Gagauziyanın (Gagauz Eri) halkı ileri dooru yaşêêr, çalışêêr, dirlik hem annaşmak alaylarında bulunarak.

İsteeriz gelän Eni Yılda bizim hepsi neetlerimiz halizlensinnär.

Ko eski yıllan barabar hepsi problemalar gitsinnär, Eni Yılda da olsun taa çok ii diişilmäk hem sevinmelik.

Gagauziyada Hristozun Duuma gününü hepsi pek beener da çok asir geeri peydalanen adetlerini

tufêr. Ayoz avşamında hepsi biri-birini afeder hem kimseylän olmaz çekişmää. Bu Ayozlu günü herkezi kendi aylesindä geçirer.

Ko 2012-nci Eni Yıl getirsin hepsinizä varlık, ii başarılar, usluluk. Bütün ürektan sizä kaavi saalık hem kısmet dileeriz!

Eni Yıllan, saygılı vatandaşlar, sizi kutlêêrız!

*"Gagauzlar" Halklararası  
Soşial Asoşiaşiyası.*

